

鳳臺縣續志卷之三

人物

劉柏齡字靜山河東村人以資爲刑部郎庶獄多所平反
俸滿薦觀察柏齡力辭劉文正公統勲稱其廉靜過人
不慕寵利奉差廣東陝甘審案皆明允紀功旋授軍機
處行走律例館纂修數年告歸優游林下二十四載未
嘗出入公門晚年家貧操守益堅祁姓有大獄持萬金
求請托柏齡笑而卻之郡縣舉鄉飲兩推柏齡大賓以
爲士林式焉

關遐年字鶴亭大陽鎮人由進士歷吏部主事員外郎陞
禮部郎中充己酉會試同考官所取極一時之選阮公
元那公彥成皆出其門而三薦阮元事尤爲膾炙人口
阮元學識淹博所作文多不能解遐年薦之再主司擯
之再乃取文中典故逐一註明主司始嘆服後出爲廣
西東平府知府惜後代凌夷政蹟莫考云

閻守字南薰段匠村人由武進士授長淮守備整理軍務
寬猛相濟隨大師南征得軍功封明威將軍能楷書所
書李衛公廟碑今尙存

張宗孔舉人授湖北犁川縣知縣到任未幾湖水泛溢宗孔奉委堤防不數月間工程就緒視前尤完固而所費僅及他人之半上憲獎勵調署施南府同知去任之日士民遮送共獻衣傘焉

常恒昌字芸閣大陽鎮人由翰林庶吉士歷授河南廣東道監察御史尋轉戶科給事中累居言職多所指陳奏各省命案州縣官恐遞解賠累率多設法消弭及冤民上控大吏又徇庇州縣仍發原官覆審覆盆之冤何由昭雪又奏近來州縣聽訟遇良善殷實之戶被人指控

者多視爲奇貨不肯迅速斷結且枝生節外索瘢求疵
陽被以不韙之名陰濟其無厭之欲因之奸胥蠹役勒
索百般佐貳教職等官亦藉以染指分肥扶同干預遂
使力詘者蕩產傾家懷憤者輕生殞命病民之政莫大
於是兩奏均蒙

俞允復奏晉省借易倉穀擾累滋弊名爲接濟民食實則
朘削民財名爲出陳易新實則挪新掩舊云云尤爲切
中時弊其他數奏得

旨允行者甚多一時想望丰采出爲雲南迤西道管理銅

政適漢回民爭利械鬪聚眾殺傷恒昌馳往解定不煩
一兵而渠魁伏法陞福建按察使旋授浙江布政使時
倭夷陷定海甯波等郡縣恒昌朝夕防堵總理軍需供
應無絀定海難民叢聚省垣首倡捐廉以給其食浙省
糧米半資湖廣道途旣梗民食維艱恒昌預於軍餉中
別貯米十餘萬石以應匱乏全活尤眾先是恒昌在福
建時因防堵倭夷積勞致疾至是戎馬交馳精力益困
復與執事者議和戰意不合遂乞骸骨歸居鄉數載以
病卒所著有靜軒遺稿未梓

祁爾誠字竹岩北尹寨村人由進士授興國州知州值歲饑民貧不能輸賦爾誠自出已資代民完納一時有衆母之稱好博覽堪輿醫學靡不宜究鋟梓傳徵君山女科數卷手加評註焉

劉玉衡字星垣郡人幼貧苦賣卜於武陟縣市中後因承辦漕務保授安陽縣丞丞有河責玉衡微時奔馳深識河道堤防屢著功效擢爲武陟知縣判獄明決訟無留滯嗣奉委治河水發被溺沒於王事焉

陳筠字竹圃大箕里人嘉慶間任滑縣知縣署密縣篆在

密時值大旱祈雨步行七十里山路崎嶇略無倦色及
歸雨澤沛施張炳華贈詩有句云甘霖普澤隨車至雅
愛能參造化功

張涵郡人進士事繼母以孝聞授山東新臺縣知縣值蝗
雹爲災立請發帑賑濟且捐俸金親歷民戶分別救卹
賴以全活者甚衆繼知萊陽縣事修理文廟培養士子
勸捐邑紳數千金復自輸俸金三千餘作本生息以濟
膏火資斧之需文風一時丕振去任後萊民尸祝之

王秘書字行南郡人少篤學爲諸生時與施蓮舟齊名邑

令洪梓其文行世旋舉經魁任臨汾縣教諭諸生貧者
不受其贄且出資以助其讀親爲教誘士咸感奮及門
受業者日益衆在臨汾十八年陞蒲州府教授士子攀
轅泣別不忍其去後自蒲告歸設帳家塾一時名士多
出其門雖居城中不至偃室邑宰往謁者輒辭不見焉
王士桓字公瑞江匠村進士宰確山縣十餘年邑臨孔道
民俗刁悍白晝搶刼士桓清囚繫懲奸蠹禁盜賊令民
更新有故犯者刑無赦由是盜賊潛消士民懷德家家
戶祝之所著有朗陵詩集數十卷

翟鳴陽河底村人進士兩充浙江己亥癸卯鄉試同考官
旋補東陽知縣東陽民疲而玩鳴陽革弊俗振文風著
有善政後丁憂回籍不復仕進儒素終老焉

張士達字練堂周村人天資聰穎弱冠由拔貢鄉舉第一
設帳閭里生徒從者以百數一時名士多出其門周村
爲邑西衝道舊有城垣久傾圯士達重修完固樓堞一
新並於城南加建奎樓以培文脈同治六年賊自吉州
渡河澤郡戒嚴軍隊出周村者往來如織兵賊莫辨士
達令眾閉門堅守而自率鄉耆數人出城巡察備壺漿

以食軍士使繞行城外毋得一人入城闔城居民賴以安堵云

文苑

李錫麟字徵生號鐵船舉人卓犖不隨俗肆力於詩古文詞肄業晉陽書院與李東木李鑾宣齊名一時有三李之稱著有鶴棲堂詩集又輯山右詩存若干卷已均梓行世古文摹倣歐柳格調高雅惜散失不可多得時人珍之

李青藜字太照高都鎮人舉人學識淵博文詞高雅著

四府擬體數卷孫文定公嘉淦深加獎許爲之作序又有續女仙外史數十萬言惜其書今皆散失弟青霞姪本淵俱登賢書有文名詳見馬鑄式高都文苑紀略載藝文

范振新字春山貢生攻苦詩學著有織梭亭詩稿其子鼎字梅塢邑廩生詩筆尤工所作甚富有匡來詩集數卷俱未梓刻

王栻字菊裳廩貢生官榮河縣教諭雪峰少司農之孫富貴爲一邑冠後家道中落冷署寒窗吟咏自適著有永

風樓吟草

董緒字經倩舉人官淮安同知著遜園詩集苗令琮舉人
著一瓢山房詩集胥繩武字燕亭拔貢生官萍鄉知縣
著燕亭詩鈔王崧生字午山恩貢生著耕餘吟草秦汝
默字聲吉諸生著葭渚詩鈔張大綬字翰芳諸生著梅
南詩集子厚山諸生以字行著蕙圃詩草李和中字介
人恩貢生著效顰集郭飛熊字渭濱諸生著藥圃吟草
監生張文炳字南野廩生趙錦儒字天章亦皆能詩之
十數人者詩集已梓未梓或存或亡代遠年湮渺難尋

問茲據山右詩存錄出以彰幽隱而詩存僅見半部詩人遺漏尙多補闕拾遺是所望於後之君子

李麟伍字鹿儕舉人授孟縣教諭律身謹嚴一鄉推祭酒太守重其品誼舉孝廉方正幼學詩於陽城張晉生平作詩甚夥惜其佳者多散失云

宋學禮字立亭邑諸生性落拓屢薦不售因以詩酒自娛著有蝶香齋詩集已梓行世

馬鑄式字楓堦舉人才思豪邁磊落不羈著有五嘉軒詩集沆瀣一瓢詩草已梓行世

馬之瑛邑庠生鑄式祖也著有琢齋詩草其子若孫皆能
詩子效周庠生著有東園遺草孫廷擢庠生著有傳岩
草廷一庠生著有舟中咏

申企中字仰亭號南邨進士少聰穎專研理學家貧斷炊
攻苦不輟其文清真雅正理解湛深主講明道書院士
林奉爲楷模所著主敬堂稿南村課幼文主敬堂續稿
皆梓刻行世

施大士字蓮舟原籍榆次縣父璿樞以進士爲澤州府教
授遂家焉大士生而穎異爲諸生時文名籍甚邑令洪

梓其文行世年十九舉嘉慶癸酉科亞元爲吉州學正
未幾卽告歸以棋酒自娛家無儋石晏如也其文清真
雅正一歸諸理士林宗之

任暉字暘谷貢生官孟縣訓導書法出入二王兼以八分
時人珍之

李燦莊貢生學書於傅徵君山筆法秀勁郡中碑版多出
其手今有存者

王煉字丹石司徒村人爲王賡庵少司空記室以監生考
授州同工書法遠近爭構年八十餘猶揮灑不倦

焦金臺字英堂監生原秉連字夏四諸生李樵諸生秦萱
字古香貢生均以草書名

孝義

李學易農家子也母病篤割股和藥以進母服而愈門有
匾曰割股痊親

趙廣宗山底村人父紹武工詩載山右詩存遊廣省客死
廣宗年十歲聞訃欲奔赴祖母憐其幼阻之及祖母與
母氏俱歿廣宗盡貨田產往尋父骸至漢口鎮資斧已
竭沿途賣卜以謀旅食抵廣得父骸於南海縣義塚艱

苦負骸歸塋卽於墓旁築屋獨居三年撫松號泣哀感
行路同治年間旌表入孝義祠

李東陽字向暄司徒里人父經商楚蜀中忽傳一意外信
東陽年十五憂泣不食白於母往尋父標父年貌梗概
於說帖步行風雪中數千里至四川白河縣遇一叟示
以處乃趨湖北光華縣果得父悲喜交集遂偕歸自是
父每外出必隨侍不少離性仁厚好濟人族中孤寡多
收養使成立鄰王姓停柩三世與之地且助以貲鄰婦
李昧人債勢將興訟東陽代爲償而不使知同治間旌